



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 10

Malaysia PM akümtsü
jenjang nung Ismail Sabri lir

World Athletics U20 Championship:
Rohan Kamble semi-final-i iogo



VOL. XVIII NO. 307 (ADOK 307) DIMAPUR

ROGONÜ (FRIDAY)

LUROI (AUGUST) 20, 2021

₹ 5.00

State sorkari nübur mashi lenmang nung manitsüla: NPCC

Dimapur, Luroi/August 19 (TYO): Nagaland Pradesh Congress Committee ajanga sangdong ka nung, August 18, 2021 nü shisadokten senden ka ayongzüka agiba ya shidakba tangatetba nung ayongzüka masü, saka Chief Minister Neiphiu Rio-i aniba state sorkari pei ajung asa sentong yanglua telemtetba agiba aser yimsüsüba nung Nagaland nung aliba tribal hoho 14 anishiba ka dang lir, ta ashi.

Naga nunger yimtenren ken o nung tangatetep kati arutsü tangatetba nung NPF-i sorkar nung dena Nagaland United Government (NUG) tentetba yagi yimtenren tasa tamajung ulushitsü saka nüburtem maneni tim atemtsü, ta NPCC sangdong ajanga ashi.

Osang-tsüsang balala nungi angazükba nung, iba senden nung Chief Minister aser dangartemi o jembiba ya jungjunga shisadanga, Nagaland nung ozüing yangluba ya Nagaland Legislative Assembly nung masü State Banquet Hall dangi melenogo, kechiaser shimteta aliba züngsem 60 yagi pei teinyaktsü mapa senzüka yutsür state rongsen amozüktsü atema kisüing temolung agütsür, ta NPCC ajanga ashi.

State sorkar aser yangji teshimtet tembartemi maneni nungnanga melie nübur ashioktsüba mapa inyakba nung NPCC ajem-ajema malitsü.

Dimapur-Peren arütsü asoshi state sorkari taoba mapang committee ana shimteta lir aser parnok indang osang ya sorkar kabu nung lir. Anungji item report nung ajemdaker telemtetba agitsü melena sorkari tribal hoho 14 nem nungloksü. Mezüngbuba nung, yimtsüing balala tsüingta arütsü tsütsü mangatetep adokba ya state sorkar meshidakba ajanga lir, kechiaser CSO sapang kar nung ajungmesor liaka mangu amai yutsür, ta ashi.

Item rongrong-shirong adokdaksür anema mera agitsü

melena state sorkar teka metsüka aser tribe hoho 14 nem khuret agütsüba ya tajangzük kangabo malisü. Anungji state sorkari teshisadang melie telemtetba agiba meyipa agitsüla, ta NPCC sangdong ajanga ashi.

Chief Minister Neiphiu Rio-i RIIN ken o nung atsüingzüka aoba ajanga opposition maliba sorkar ka tentetaka pa tasü maitba sayur.

RIIN maparen ya pai anir tenzüka lir, saka tangbo pai India nunger dangar senso asoshi süoki ia bilemba jembir, anungji RIIN alitsüba nukjidong meyoektepsür.

Commission on RIIN mesüra Banuo Commission ajanga lokti tentet balala den shisadokten senden balala mener ang sorkar nem report agütsü, saka ano CSO tem tebilemba bushiba mesür ano shisadokten senden tali amenba ya RIIN mapa kuma inyaktsü menudaktsüba tasa ka dang lir, ta NPCC ajanga ashi.

Anungji state sorkar anatsü nok ama yimya amshiba aitsür aser December 1, 1963 ya cut-of date ama amshia RIIN ya mapa kuma inyaktsü akhanger, ta ashi.

State nung aliba tetsür lokti tentet ka nungia nübu kata medeni ULBs nung tetsür menden asoshi jembishinüba ya tetsürtem asoshi mezüngmeshi tulu lir. 2017 kum ULB anema longkak aitba mapang rongrong-shirong aser azüdokshiba tang tashi nüburtem molungiang nung lir. Küm pezü süyioyo saka tang tashi state sorkari iba azüdokshi mapa inyaker aser ajungmesor pua mali, ta NPCC ajanga ashi.

Nagaland ya Indian Union nung shilem ka ama ali tashi constitution ajanga shia aliba ama inyaktsüba akumtsü aser tetsürtem menden wazüka ayuba tsütsü ozüing balala meshidaki meyipzüka amshiba ajanga tetsürtem senzüka yutsüba tebilemstü kodanga tajungba makumtsü, ta sangdong ajangasa ashi.

Dimapur nung Sept. 02 tashi Odd-Even system amshitsü

Dimapur, Luroi/August 19 (TYO): Dimapur district kübok nungdak aliba gari ajanga senzüsempongsü asoshi Nagaland sorkari sangdongba ama Odd-Even system nung August 19, 2021 nungi September 02, 2021 tashi alitsü, ta sangdong ka ajanga ashi.

Commissioner of Police, Dimapur, Rothihu Tetseo-i Brehostibarnü sangdong ka nung ashiba agi, Odd number anogo, Hombar, Bodhbar aser

Hokulbar nung gari registration number 1, 3, 5, 7 aser 9 agi tema aliba dang senzütsü melatsü.

Even number anogo, Mongulbar, Brehostibar aser Honibar nung gari registration number 2, 4, 6, 8 aser 0 agi tema aliba dang senzütsü melatsü ta ashi.

Iba totuyuba nung aibelener nem Motor Vehicle Act 1988 indang Section 177 aser 179 kübok temerenshi alitsü, ta ashi.

NFHRCC-i senden nung bangzüing yangluba metetdaksü

Dimapur, Luroi/August 19 (TYO): NFHRCC-i ayongzüka August 16 nü Tribal HOHO, kaketshir lokti tentet balala aser CNSA den Hotel Saramati nung senden ka menogo.

Senden nung NFHRCC-i August 7 nü state sorkar nem tezüluba nung takhangba ka agütsür aliba maneni nenshitsuü lemtet aser sorkari telangzüba

tajung ka magütsüra NFHRCC aser Tribal HOHO tem aser kaketshir lokti tentet balalai mapang telatet ka makai longkak aittsü bangjemogo, ta NFHRCC Convenor, Supu Jamir, General Secretary W. Lemba Chang aser Asst. General Secretary Chenithung Humtsoe nungeri külem sangdong ka ajanga metetdaksü.

Nagaland COVID-19: Taneptsü angur 89 aser tasen puteter 59 liasü

Kohima, Luroi/August 19 (TYO): Brehostibarnü Nagaland nung COVID-19 tashidak tasen putetba dang nungi taneptsü angur timba liasü, koba anogo trok buba atonga alitsü. State nung August 19, 2021 nü COVID-19 tashidak nungi nisung 88 taneptsü angur aser nisung tasen 59 dak iba tashidak jangjateta state nung iba tashidak agi meneper nisung 29,390 kumogo.

"Tesüiba ghonda 24 tsüingta COVID-19 positive alir nisung 89 - Dimapur nung 32, Mokochung nung 26, Kohima nung 16, Longleng nung trok, Zunheboto nung pongu, Tuensang nung ana, Peren aser Phek nung ka-ka - taneptsü nguogo," ta State Nodal Officer for Integrated Disease Surveillance Project, Dr. Nyanthung Kikon ajanga anogoshi sangdongba COVID-19 osang nung ashi.

Taneptsü ngur alirtem ya nisung 26,915 kumogo aser taneptsü anguba rate ya Bodhbarnü shilem 91.33 aliba nungi 91.57 kumogo.

"Tanü COVID-19 positive cases 59 putetba ya Mokochung

nung 19, Kohima nung 18, Dimapur nung 13, Kiphire aser Phek nung asem-sem aser Mon, Peren aser Wokha nung ka-ka alitsü," ta pai ashi.

Tang state nung COVID-19 active cases 1,024 lir, aser item rongnung nisung 187 dak iba tashidak agi timtem sümia agütsür, nisung 24 tera kangshia oxygen nung lir, nisung 12 kanga kangshia oxygen nung lir, nisung pezü kangasa mejungi kangshia ICU nung ventilator maden lir aser nisung 7 ventilator nung lir. Nisung 790 dak iba tashidak agi timtem agütsüba mali, ta paisa ashi.

Kasa mapang COVID-19 agi menepa alir asü-amaba kata meliasü, anungji tang state nung iba tashidak keter asüba nisung 608 alitsü, aser item rongnung nisung 14 bo danga tashidak den meyoekteper asüba alitsü, ta Dr. Kikon-i ashi.

Ajak senteper COVID-19 agi menepa alir nisung 843 danga state temi ogo, ta ashi.

Nagaland nung tang tashinung COVID-19 tashidak alitsü südi ta temolung melemteteti sample 295,931 tendangogo. Item ya RT-PCR nung 105,285, TrueNat

nung 72,065 aser Rapid Antigen Test nung 118,581 tendanga lir, ta pai ashi.

Bodhbarnü tashinung Nagaland nung nisung 643,833 nem COVID-19 mozü doses 821,140 agütsüogo, ta State Immunization Officer Dr. Ritu Thurr-i ashi.

State nung iba mozü agir alirtem ya frontline nung inyaker 60,846, healthcare nung inyaker 15,986, arishi küm 45 nungi tema nisung 190,321 aser arishi küm 18 nungi 44 tsüingta nisung 376,680 alitsü, ta pai ashi.

Nisung 177,307 nem moze dose tanabuba agüja parnok vaccination course tembangogo. Parnok ya frontline nung inyaker nisung 42,571, healthcare nung inyaker 12,781, arishi küm 45 tema nisung 109,835 aser arishi küm 18 nungi 44 tsüingta nisung 12,120 alitsü, ta Dr. Thurr-i ashi.

Nagaland nung Brehostibarnü nungi Unlock Phase V tenzükingo, aser iba mapang talenba talila salaogo, talisa lokti adenshiba, tekülem ki, saisapong sentongtem lir, kong taoba mapang timba agi nisung 50 dang mela liasü saka tangbo item tesemtem nung shilem 50 melar.

Dimapur Deputy Commissioner-i tetuyuba tasen agütsü

Dimapur, Luroi/August 19 (TYO): Dimapur Deputy Commissioner sangdong ka ajang, August 18 nü Home Department-i tetuyuba agütsür aliba dak ajemdaker Dimapur district nung tenokdangba agütsür alibatem kar salatsüba den tetuyuba tasen agütsüshiba metetdaksüogo. Item tetuyuba tem ya August 19 nü nungi September 2 nü tashi benoka inyaktsü.

Tetuyubatem:

1. Local grocery store, aonsotsü, angoshi, mamtsü, amtsük, amala ayokba dokantem aser LPG aser E-commerce services amala public utility service tem ajak hopta tepeyong anepdang 6:00 ako nungi nikongtsütsü 6:00 ako tashi lapoktsü melatsü.
2. Tanga osettsüt ayokba dokantem ajak aser ano New Market, Hongkong Market aser Hazi Park nung dokantem ajak Hombar, Mongolbar, Brehostibar aser Hokolbarnü anepdang 6:00 ako nungi nikongtsütsü 6:00 ako tashi lapoktsü melatsü.
3. Aonung curfew 8:00 ako nungi anepdang 4:00 ako tashi benoktsü.
4. Lokti tentet, yimden yimsüsüba, tamangba yimsü, academic, sobaliba, saisapong, Gymnasiums aser tanga lokti senden balala kong taoba mapang nisung 50 nem shilem agitsü asoshi temelaba agütsür liasü, item sendentem nung maximum 50 percent capacity tashi temelaba agütsütsü, ajisüaka sentong nung shilem agirtem

dak tashidak keta aliba temaitsü mesayutsüla, Covid-19 vaccine ajanga agir alitsüla mesera vaccine mezüngbuba dose agir anogo 15 bo süier alitsü nungdaker. Item vaccination criteria küboki maitertem ket nung RT-PCR/TrueNat/CBNAAT nung anogo 15 tsüingda agiba COVID-19 negative test report bona alitsü nungdaker. Iba den bendenloksema inyaksangshi ajak tetsüingda ita inyaksangshitsüla aser COVID-19 dak sendakba yimyayimpong shidak beshitsü nungdaker.

5. Saisapong sentongtem nung 50% capacity tashi melatsü aser kasa mapang nung lokti adenshiba dak sendakba nung tetuyuba agütsür aliba nung para (1) nung shisema aliba tetuyuba ajak sülen anidaktsüla.

6. Sorkar office tem ajak mapa inyakba anogotem nung Group A aser B officers tem noklang nung noklang inyaksangshitsü aser tanga employees tem shilem 50 dang mapa inyaktsü melatsü. Maneni Secretariat aser Directorates employees aser staff tem office-i aotsü atema vaccine agitsü nungdakba den mesüktepa state kübok office ajak employees aser staff tem office-i aotsü atema Covid-19 vaccine agitsü nungdaker. Ajita mesera anogo 15 shia RT-PCR/TrueNat/CBNAAT ajanga tashidak tendangba negative test report sayutsüsa akumtsü. Tashidak ya sorkar

facility tem nung angati tendangtetsü.

7. Sorkari two wheeler taxi tem nung pillion riding anir senzütsü temelaba agütsüogo, ajisüaka Covid-19 tashidak prokshia aoba nokdangtsü atema tetuyuba agütsür aliba sülen anidaktsüla.
8. Kima parks, entertainment parks aser südoksünema kazüba tesemtem nung nisung shilem 50 melatsü. Iba dak sendakba nung park achayangartem, tanurtem densema tesemdangertem ajak dak tashidak keta aliba temaitsü mesayutsüla aser arishi küm 18 temapurtem ajak vaccine mezüngbuba dose agir anogo 15bosa süier alitsü nungdaker. Ajita mesera anogo 15 tsüingda agiba COVID-19 negative test report bona alitsüla. Iba den bendenloksema maparen ajak tetsüingda ita inyaksangshitsüla aser COVID-19 dak sendakba yimyayimpong shidak beshitsü nungdaker. Swimming pool aser cinema hall tem maneni shibanga atatsü.
9. Sorkarisa Class X tekübok aliba class tem ajak magi atatsü aser school temi tang agia aliba ama online ajanga dang tesayuba agütsütsü. Tetuyuba sülen manidaktertem jak Disaster Management Act 2005, section 51 nungi 60 tashi aser IPC section 188 kübok tapet tesemrenshi agütsütsü, ta kasa sangdong ajanga metetdaksüogo.

Kohima nung World Photography Day mungogo



Taoba IPR Director (Rtd.), Limawati Ao-i noksa yanglutepba sentong lapoktsüba noksa nung angur.

Dimapur, Luroi/August 19 (TYO): Team Noksa-i ayongzüka August 19 nü D Cafe Kohima nung World Photography Day mungogo. Iba sentong nung retired Director IPR, Limawati Ao alakteta jaoker liasü.

Sentong nung o jembiba mapang Limawati Ao-i, Kohima nung aliba photographer tem dang pei tejangraba maneni inyaksü aser pei poksüng aatsü atema dang masü saka Naga nung takar sobaliba ajungkettsü aser alima dang Nagaland tebor ajung sayutsü atema iba sabang amshitsü ajungshi. Paisa, lanurtem aser tang roteta aliba

photographer tem dang photography ya kanga süoki ia agitsü ajungshi, kechiyong küm ishika tsüngda photography ya mapang tongtibang ka kümogo, aser iba ajanga nisung aika pei poksüng aazükteta liteter ta ashi.

Maneni sentong nung Advisor TAFMA, Theja Meru-i, sentong takok ngua ayongzüka atema sentong ayongertem nem tenüngsang agütsü, koba Kohima nung mezüngbuba liasü. Pai, entertainment industry nung photography ya kanga tongtibang shilem ka ta shia, photographer tem dang meranga inyaksü aser state

indang art balala ajungkettsü ajungshi.

Team Noksa tenüng nungi jembiba mapang Suchamayang Kichu-i, iba sentong ayongzüka agiba nükjidongji Kohima nung aliba photographers tem ajak longjemer "The World Photography Day" amungtsü aser photographer temi pei mapa nüburtem dang sayutsü atema sabang ka agütsütsü asoshi liasü, ta ashi.

Iba sentong agiba mapang photo exhibition ka liasü, kong Kohima nungi photographer tem nem parnok indang photograph tem sayatsüba dang masü saka ayoktsü atema maongka agüja liasü.

Mokokchung SDEO-i metetdaksür

Mokokchung, Aug 19 (TYO): Government Middle School A and B Sector, Penli Ward, Mokokchung kimung ya Mokokchung yim Kichu kidongi Government Middle School amenoktsü nükjidong nung tenlaba lir, anungji, iba kimung ya education

department meyong kümogo, ta Mokokchung Sr. Sub-Divisional Education Officer, S.N Sungkum-i sangdong ka ajanga metetdaksü.

Anungji, iba kimung ya shingaiia atsünga/rakzüka marutsüla mesüra iba school kimung nung shingaiia

osettsüset ayutsü memelar. School kimung nung nisung kari danga osettsüset yua lira, iba sangdong adokba anogo zünga tenet (7) nü tsüngda nung agiintsüla, aji mesüra tashi mangar anema tapet mera (action) agitsü, ta Mokokchung Sr. SDEO-isa metetdaksüogo.

KLC nung kaketshirtem nem tetushi agütsüba sentong agi



Dimapur, Luroi/August 19 (TYO): August 19 nü Nagaland University kübok Kohima Law College nung taoba academic session nung takok anguba kaketshirtem nem tetushi agütsüba sentong ka agiogo. Tatidang nung regular kaketshir ama parnok 40 aser repeater ama parnok 11-i takok ngua LL.B degree agizükogo. Parnok rongnungi B. Chunon Konyak aser Abigial Lotha na 1st Division nung takok ngua liasü.

Sentong nung college

Principal densema Assistant Professors Tompok Pongener, Sentitula aser Moasenla nungeri ojembiba mapang takok anguba kaketshirtem nem tenüngsang agüja liasü.

Tesayurtemi o jembiba mapang, law practitioner ka ama legal luyim nung ajemoka aiba mapang bendanga agüja meranga aser aremzüka inyaksü atema kaketshirtem ajushiba den LL.M züingnürtem Nagaland University nung züingtettsü ta ashi.

Maneni students' Welfare

teacher-in-charge Asst. Professor Kezhokhoto Savi-i, 'Legal Profession' ya kanga dang meraket luyim ka aser lokti-i legal fraternity dak nungi aika imlar, ta ashi. Paisa, legal fraternity aser talisa obendanger tejentemi tang graduate süzükertem dang nungi aziüka inyaksangshitsü, yimayimpong shidak benshitsü aser meranga inyaksü imlaa atar, ta ashi.

Sentong tatem küma tesayurtemi kaketshirtem atema sarasadem sütsü aser iba sülen süngo jemer sentong tembang.

Mokokchung district ASHA pur nem training agütsü

Dimapur, Luroi/August 19 (TYO): Mokokchung district nung aliba ASHA pur nem Pediatric Care in COVID-19 training Mangkolemba block nung August 18, 2021 nü tenzüko. Tila-tanurtem dak ajungbena COVID-19 tashidak talila akumba mapang yaritsü asoshi renema alitsü atema iba training ya agüja liasü.

Iba training ya tanüngba block tem nunga agitsü aser August 30, 2021 nü tembangtsü.

Chief Medical Officer Office, Mokokchung ajanga sangdong ka nung ashiba agi, ASHA tem nem tila-tanur dak COVID-19 agi menepba temaitsütem, mita anepaluba aser symptom tem angatetdaksür aser tanurtem dak COVID-19 atemba tsütsü ashi-apongba ASHA tem teinyaksü indanga sayur.

Iba training sentong nung district trainer tem ya health unit balala nungi SMOs, MOs aser CHOs tem alitsü.

Tizit nung 144 Cr.P.C benokogo

Dimapur, Luroi/August 19 (TYO): August 18 nü Konhoa tesem nung Jaboka aser Yannu yimtsüng na tsüngda alidak sendakba nung mangatettep adoka tzülü, süngtonglitong aser tsünüsenpongtsü raksaba den jen rongtoktsüba dak ajemdaker Additional Deputy Commissioner, Tizit, Pakon Phom-i, 144 Criminal Procedure Code, 1973 kübok tenokdangba agütsüba metetdaksüogo. Paisa, sub-division yimjung nung toktsütsü atema Criminal Procedure Code, 1973 kübok section 144 benoktsü atema kuli tejingja lir, ta ashi.

Iba dak ajemdaker ADC-i tenokdangba kar agütsüogo.

1. Lokti mesera jurila tesemtem nung mapang ka nung nisung pongu dak tema adenshitsü memelatsü.
2. Nüburtem senzügenpongtsü memelatsü.

3. Passenger gari tem densema nüngdak makaba nung garitem senzüsenpongtsü memelatsü.

Ajisüaka iba tziükba küboki District Administration, Police, Para Military Forces, Magistrate on Duty, Doctors aser Medical Staff aser jongdak maparen dak sendaka alirtem maittsü. Iba den bendenloksema tenüngdakba osettsütem belenshiperaba menokdangtsü.

Iba tetuyuba ya 19.08.2021 anepdang 6:00 ako nungi benoktsü aser tetuyuba tejangja ka magütsü tashi benoka atatsü.

Iba tetuyuba sülen manidakertem Indian Penal Code Section 188 kübok tapet temerenshi agütsütsü, ta ADC-isa metetdaksü.

Criminal Procedure Code, 1973 section 144 ya Loakho yimtsüng junction nungi Longting yimtsüng tashi km 2 telongtet nung benoktsü.

Noklak COVID-19, DTF senden menogo

Dimapur, Luroi/August 19 (TYO): COVID-19, Noklak District Task Force den COVID-19 atema District Nodal officers, Additional Secretary, Horticulture, Zarenthung Ezung aser Joint Director, H&FW Dr. Thanghoi Lam nung August 19 nü DC Conference Hall, Noklak nung lepareprangshiba senden ka menogo.

Senden nung Additional Secretary, Horticulture Zarenthung Ezung-i, Covid-19 wara wave anabo ajangshiogo aser tasembuba wave agi kongshitsü akok, anungji iba atema renema alitsüla, ta ashi. Paisa, district nung COVID-19 tashidak tendangba jenjang ajungkettsü aser vaccine agütsüba sentong tali benoktsü ayongzüka. Zarenthung Ezung-i ashiba agi, district nung infrastructure agi anünga liaka, nüburtemi kümdanga aliba den vaccine agia sorkari agütsüba tetuyuba aser SOP sülen anidakra COVID-19 wara wave tasembuba ajangtettsü.

Kasa mapang nung Joint Director, Directorate of Health & Family Welfare, Dr.Thanghoi Lam-i, wara jenjang

metetdaksü aser tang wara pokteter aliba koda achaayangtsü, iba dak sendakba nung tongtibang onüktem metetdaksü. Paisa, district task force dang Tuensang nung amenoka aliba BSL lab 2 takokba tashi amshitsü metetdaksü. Maneni Dr. Lam-i contact tracing, vaccination aser district atema tanga tenüngdakba maparentem indang jembia liasü.

Vaccine agiba dak sendakba nung Dr. Thanghoi Lam-i, vaccine indang tangazükba agütsütsü atema sentong ayongzüka agitsü aser social media balala nung olulu osang prokshibatem jangjashitsütsü ajungshia liasü.

Iba senden ya Deputy Commissioner Noklak, Hiazu Meru lenisüba nung agi, aser pai Kohima nungi aruba lenirtem pelashishia agizükba den district nung COVID-19 den raratsü atema renemshiba aser tashidak azüoktsü atema jenjang balala agiba indang tongmelang agi metetdaksü.

Iba senden nung DTF züingsemtem, HoD tem, lokti tentet balala aser Arogo tenzükertem dena liasü.

Silchar nung Congress züngsem 34-i party toktsü



Barak Valley nung Congress lenir kar yangi noksa nung angur.

Silchar, Luroi/August 19 (Agencies): Assam kübok Barak Valley nung Congress lenir aser worker 34-i All India Trinamool Congress nung adentsü atema party primary membership nungi resign süogo.

Taoba All India Mahila Congress Chief aser ex-Silchar MP Sushmita Dev, Kolkata nung TMC den adenba sülen tang Congress züngsemtemi party toktsüogo.

Congress party toktsürtem rongnung Rajesh Deb, Silchar DCC general secretary (organisation), Rahul Alam Laskar, general secretary (admin) Silchar DCC, Papan

Deb, general secretary Silchar DCC, Sajal Banik, Silchar Town Congress committee tir, Anupam Paul, INTUC Cachar tir, Shyam Sundar Kalwar aser tangartem densema lir.

Lenirtem tesem balaka nung parnok tebilemba lemsateptsü atema senden ka mena liasü.

"BJP aser Congress-ia Barak Valley renloka aoba nung tetsükdaktsü bener arutsüba onoki nguogo koba kanga tia maka. Ajisüaka AITC mendenbula aser West Bengal Chief Minister Mamata Banerjee inyakyim agi onok ajungmesor.

"Onok lenir Sushmita Dev-i nüburtem aser talisa Bengali oshi

jembirtem atema inyaka aruogo aser tetsükdaktsü aika liaka onoka party atema tekübokba jenjang nung inyaktsü atema ajungmesor. Taoba Silchar MP aser onok den sendaktepa alirtem shirnok Congress party nung dena lir, parnoka tanema tanemi AITC nung dena onok den külemi inyaktsü imlaa atar," ta Deb-i ashi.

Paisa, West Bengal Chief Minister Mamta Banerjee-i, taruba ita ana tsünga Silchar semdangtsü akok, ta shiogo.

"Onok lenir Sushmita Dev la tawabangba nung party nung denogo aser onok AITC atema lokti ka ama mapa inyak tenzükogo," ta Deb-isa ashi.

Tripura HC-i TMC lenirtem anema final report mebenoktsü tuyu

Agartala, Luroi/August 19 (Agencies): Tripura High Court-i, Trinamool Congress lenirtem anema ken o benoka aliba bushitsüngdang maneni sütettsü saka police dang okadak ajanga temelaba magi tashi final report mebenoktetsü, ta shiogo.

HC-i Bodhbarnü iba ken o September 2 nü maneni angadangtsü metetdaktsüogo.

Ken o benokba nung TMC MP Abhishek Banerjee aser Dola Sen, Bengal education minister Bratya Basu, party lenir Kunal Ghosh, taoba Tripura minister Prakash Das aser taoba MLA Subal Bhowmik nunger tenüng shisema lir.

Ex-MLA Bhowmik-i, HC dang parnok anema ken o benoka aliba agintsütsü mepeshia liasü.

Chief Justice Akil Kureshi matsüngdang nokdakba mapang Senior advocate Sidharth Luthra-i, August 11 nü Khowai, chief judicial magistrate-i ken o bushitsüngdangtsü atema tetuyuba agütsüba agintsü mepeshi aser September 8 nü final report benoktsü aliba ya mebenokdaktsütsü mepeshi.

Pai ashiba agi, parnok anema ken o benokba ya teyazü kulitem dak ajemdaker benok aser

yimden yimsüsüba tsütsü tajangzük angutsü atema benokba lir.

Maneni Luthra-i, aibelen atema bail agütsütsü langa lir aser aija alirtem bial atema magistrate matsüngdang nokdaktsü kecha nüngdak mali, ta ashi.

Paisa, police station tangaka kübok aibelenba ka atema parnok Khowai police station-i anir aruba ken o ashishia liasü.

Kasa mapang nung Tripura advocate general S S Dey-i ashiba agi, Disaster Management Act kübok aibelenertem nem police station nung bali agütsü saka parnoki aji magizük aser magistrate matsüngdang nokdaktsü akhang.

Justice Kureshi-i pa indang order nung, "ken o maneni bushitsüngdangtetsü, saka okdak ajanga temelaba magütsü tashi final report mebenoktetsü," ta ashi

Khowai police station nung ken o benoker aliba nung, Trinamool lenir 14 pua August 8 nü okadak nokdaktsü atema police station-i anir aruba mapang TMC lenirtem aru aser parnok inyakyim nung tetsükdaktsü adokdaktsü, ta shia lir.

Guwahati tezülen sen crore 4 alang Heroin apu

Guwahati, Luroi/August 19 (Agencies): Assam police-i Brehostibar anepdang sen crore 4 alang heroin gram 660 puogo. Temesepba mozü ya Guwahati tezülen Jorabat nung tata gari ka nung bener lia apu.

Police-i ashiba agi, Manipur nungi temesepba mozü bener aruba indang osang tejangja angazükba sülen parnoki anepdang 4:30 ako shi nung

Basistha Police station kübok Jorabat tesem meita ao.

Tata gari ka soter bushisüngdangba mapang temesepba mozü ya engine nembangba telung nung inoka bener lia ngutet.

Ajak senteper heroin gram 660, plastic soap case tem nung inoka bener lia ngutet.

Police temisa gari anishisang ket nungi sen 45,000 aser

mobile phone ana nguteta liasü.

Temesepba mozü apuba dak sendakba nung Warish (2) aser Jennyson Tayenjam (20) na pua lir, ta police-isa metetdaktsü.

Tenaprongla ya Manipur kübok Thoubal district nungi lir.

Tena anema ken o ka benokogo aser ken o maneni bushisüngdangdar, ta police ketdangsur kati metetdaktsü.

Manipur: Security forces-i IED ngutet



Imphal, Luroi/August 19 (Agencies): Manipur nung Security forces-i IED (Improvised Explosive Device) amshia amaktsü aliba nokdangogo.

Assam Rifles, Chassad Battalion nungi sepaitemi India aser Myanmar arrtsü len IED asem aser bomb yangluba mapang nung amshiba oset aser hadir balala nguteta liasü.

IED ya Manipur kübok Kamjong district nung nguteta liasü.

IED den külemi explosive stick, detonator aser safety fuse

tem nguteta liasü.

"Telungpurtem senzusenpongba osang tejangja ka angazükba sülen Assam Rifles sepaitemi Indo-Myanmar anasa tesem ka meita ao. Meita aoba mapang sepaitemi IED den explosive stick, detonator aser safety fuse kar nguteta liasü," ta AR sangdong ka ajanga metetdaktsü.

Kasa mapang nung sepaitemi ngutetba IED aser tanga osettem ajak Kamjong Police Station nem bendanga agütsüogo aser ken o maneni bushitsüngdangtsü.

Assam CM-i Golaghat nung ki shia-i tua vaccine agütsütsü tuyu

Guwahati, Luroi/August 19 (Agencies): Assam Chief Minister Himanta Biswa Sarma-i Bodhbarnü Golaghat district administration dang, ki shiai oa vaccine agütsütsü atema ketdangsurtem yoktsü tetuyuba agütsüogo.

District nung covid tensa asadanga mapang pai, Deputy Commissioner Mrigesh Narayan Baruah aser health ketdangsurtem dang anogo nung nisung 10,000 nembosa vaccine agütsütsü atema nukjidong ayutsüla ta ashi.

Paisa, district ketdangsurtem dang Jal Jeevan Mission kübok süngolu, Anganwadi centre aser

elementary school tem nung piped water connections agütsütsü atema tali rangloker inyaktsü metetdakja liasü.

Maneni pai, PWD (Roads) Department dang Dergaon nungi Golaghat tashi four-lane lenmang yanglutsü atema asameyangtsü tuyu. Sarma-i PWD (Buildings) Department dang district kübok Dergaon aser Sarupathar constituency tem nung sports complexes amenoktsü atema blueprint renemtsü metetdaktsüogo.

Paisa, deputy commissioner dang district nung medical college ka amenoktsü atema ali shimtsü tetuyuba agütsü.

**GOVERNMENT OF NAGALAND
DIRECTORATE OF LABOUR
New Capital Complex
NAGALAND: KOHIMA**

File.No.LBR/ESTT-762/19//

Dated Kohima, the **th** August, 2021

CIRCULAR

Reference is made to this office Advertisement No. LBR-10/75(Vol-IV) dated 27th September, 2019, published in Nagaland Post to fill up the three post of LDA cum Computer Assistant laying vacant in the office of the Labour Commissioner, Nagaland, Kohima, the undermentioned Roll.Nos who have qualified in the written exam are notified to appear for Computer Practical exam and viva voce on 25th August, 2021 at 10:30 AM onwards in the Office of the Labour Commissioner Nagaland, Kohima. The selected candidates are further directed to bring their Admit Card issued earlier by the department for written exam along with original academic documents and other relevant Documents.

Sl.No	Roll No.	Sl.No	Roll No.
1.	LBR-53	8.	LBR-362
2.	LBR-71	9.	LBR-430
3.	LBR-121	10.	LBR-455
4.	LBR-298	11.	LBR-456
5.	LBR-342	12.	LBR-517
6.	LBR-353	13.	LBR-522
7.	LBR-360	14.	LBR-619

It is notified that no further information will be communicated to concerned candidates.

Sd/- (Er. S.L.WATI AIER)

Labour Commissioner
Nagaland, Kohima



TIR YIMYIM YIMOBILEM (EDITORIAL)

DIMAPUR ROGONÜ, LUROI (AUGUST) 20, 2021

Nagaland nung Naga nunger longjemdak

Northeast India nung Naga nunger alidak tesemji Assam, Arunachal Pradesh, Manipur aser Nagaland lir aser item dakji alaka ano Myanmar nungbo Naga nunger aliba limaji Nagaland dang tuluba lir. Itemji asen lima, asen kinungertem aser asen otsü, anungji asenok ajaki meteta alitsüla aser akok tashi yariteptsüla. Atangji, Naga nungersa süaka asenok Aortem aikati Nagaland nung aliba Naga nungertem dak alaka tanga nung aliba Naga nungertem indang meteta malitsüa akok, kechiyong Nagaland nung aliba dak alaka tangalen Aor yimtem kümteta aliba Ao lima mali. Ajisüaka, tangar Naga kintembo tatishitsü agi, Angami nunger adianutem Manipur state nung lir, Rengma aser Zeliangrong nungertem Assam nung lir, Khiamniungan aser Konyak nungertem Myanmar aser Arunachal Pradesh nung lir. Itemji kasa Naga nunger ser nung asenoki memeteti tangar bendangertem arua India nung yimsü asüandang parnok mulungba ka nung arr ladangtsüba ajanga tanü yimten balala kübok asenok alir. Aji oda, Konyak lima Mon district nung Longwa yimtakbo India o Myanmar na arrtsü anghba'er ki tiyong nung ladangja lir. Iba jagi tanü tashi Naga nungertemi Naga nunger lushi aser nütsüng ajak yimten yimsüsüba ka kübok alitsü temeten indang jembir. Kasa temeten aser tejangrabaji Nagaland state akümtsü atema India government den renemba ken o 16 Point Agreement nunga shisema angutsü. Ajisüaka, lemdangtsüadoker asünungji, asenok külemi yimten ka kübok linüyonga tanü tensa agi Naga nunger lushi ajak yimten ka kübok bener arua ayutsüabajibo tamakoktsü amaika kümogo. Iba ama mapang ka nung, anüng kübok alir Naga nunger ajak asoshi nungdakbaji külem lokti telongjem ka nungdaker. Iba jagiang alushi aser nütsüng ajak political map kati maityonga pei adianu temeim sobaliba mamadoki külemi alir ama, Naga nunger sobaliba aser otsü tajung mesamadaktsüi meimtepa aser yaritepa alitsü. Iba tangatetba nung NSCN-IM teloki Pan Naga Hoho ka alitsü nungdakba indang jembir südi. Iba tebilembaji Naga nunger rongnung rakpoka shisalemsatep nung ajungtsü. Iba dakji alaka, ano Nagaland nung alir Naga nunger kintem ajak ajurutepa shisalemsatepdak aser telemtetba agidak telongjem ka nungdaker, kechiyong Naga kintem alima balala nung sükshia alirtem ajak asoshi Nagaland ya temulung lir. Tetezü, Naga nunger temulungjangji Nagaland lir, anungji Naga nunger ajungtsü atema Nagaland nung alirtem ajungtsüla. Ajisüaka, ajak atema tia maka kaji, Nagaland nung aliba Naga kintem ajak longjemdak lokti telongjem ka maka, jungnüseta majunger aser putepnüseta meputepteter. Iba ama mapang ka nung, yakanü Kohima nung state government-i Nagaland nung aliba Naga kintem ajak nungi lenirtem jaoka shisalemsatepba mapang, Nagaland nung alir Naga kintem lokti telongjem ka nungdakba indang reprangteta jembibaji kanga rongdak nungdak mapa ka indang jembibago ta angatetter. Atangji, tanga Nagaland nung lokti tentet NTC, CNTC aser ENPO ama tongtibang lokti tentet aika tenteta lir, saka item jagi Nagaland nung aliba Naga kintem ajak mawabangtetter. Aji oda, ajaki tajung bilemer saka tajung tebilembaji külemi telongjem ka kübok süboka jembitsüsa külem sabang maliba agi, Naga nunger yimten tebilemtsü yaa telemtetba kati arunüseta marutet kangshiba angur. Joko, asenok Nagaland nung alir Naga kintema asenoksasa asenok yamai timmatemtsüla aser temulung lapoka telongjem sabang ka nung adenshitsüla. Joko, kodang Nagaland nung aliba Naga kintem telongjem ya kümtetdir, iba telongjemjiang "Grand Tribal Council of Nagaland" (GTCN) asütsü. Iba Council jagi alima nung Naga kintem ajak longjema alitsü asoshi ano sabang tesademba ka bushitsü aser teti Naga nunger sobaliba, oshi aser yimten otsü wazüka ayutsü atema inyaksü. Iba Council-ibo Naga yimten tebilemtsü latettsüba maparen nunga o tongdar aser teyariteper dang mesüi shisa tajung agüja telemtetba ka dangi arutsü asoshi lenisüba agütsütsü. Iba Council yabo Nagaland state government dang nungi temaba amato bilema, lenirtemi political party dak merangloki Nagaland renloktsü aser Naga nunger ajungtsü atema marendaki jembiba aser inyakba telongjem ka asütsü. Iba telongjem ya Naga kintem tsüngda apu ka ama mapang tajung aser tamajung ajak nung ajurutepdakja shisalemsadaktsüba sabang ka asütsü. Iba sabang ya koba ama karaa yanglutetdir, iba amaji Nagaland nung tesünep alitsü aser Naga yimten tebilemtsü yaa telemtetba tajung kati bener arutsütettsü. Iba asoshiji asenok kanga sarasadema inyaksü nungdaker.

OLEMSABANG

Arok Tenzükba Mapa aser Temeshi Laishiba

~ Dr. Zülu Jamir (Osang zülur)

Yanglushidi Sensaksem Sabang (YSS) telok "Arok tenzükba mapa aser Temeshi Laishiba" onen nung ajemdaker May 17, 2021 Rev. Wati Jamir, Senior Pastor, DABA sendong lenir sür Dr. A. Tali Ao, Dr. Limala Longkümer aser Dr. Narola McFayden, parnoki aseme jembiba aser o lemteper mapang jembiba olung kar tarutsü nung bilemdangtsü atema lemsateper.

Dr. A. Tali Ao-i onen indangji Lai tesayuba tsütsü nungi jembi. Tasen Lai nung Yisu Khristai tentetba lokti dang Ekklesia ta ajar, ibai Greek aser Rom yimli nung tentetba Ekklesia dang nungi keni balaka lir. Greek aser Rom yimli ajanga tentetba Ekklesia nung tetsür, tanur, bendanger, alar, sensaker, kilir aser item amala jenjang makaba nübutem mezüngoker. Saka Yisü Khristai tentetba Ekklesia nungbo mimchir kecha tebandang makai ajak temeden kasa kar.

Tenyar Pauli Galatia 3:27-28, nung ashiba ama, "Khrista nung ajak ka dang" ta tasü ita küli agütsüba ama, Tasen Lai tesayubaji, kechi koda tenüktelen ajak shilem balala lir, saka temangbo ka dang lir, aji oda iba ajanga amangbapur ajak jenjang medentsür.

Arogo nung tenzükba mapa nung nükmenji Yisu Khrista lir. Arogo nung Yisu medeni inyakba mapa ajakji amajok, saka Khrista tenüng nung temeim, teyari aser taneptsü mapatem nung jenjang lir, aser item ajakji Yisüi tatishitsü küma sayua inyak. Arogo nung tenzükba tongtipang shilem asem lir, itemji Tenyar, Putir aser Kilir mapa. Yisui tenzükba jenjangji ajak dang ajemaluba kilir küma inyaktetta asenok nem tatishitsü tulu doktsü. Tenzükba mapaji kilir aser alar mapa ta angateta kodang inyakdir iba nung temoatsü aser jenjang tulu lir.

Arogo tenzükba mapa, Tenyar sülen Arogoji tamburtem (elders) mesüra Presbyters dangi ketdangtsüba aru. Parnok dangji Episcopal mesüra overseers ta aja. Iba sülen küm noklang ana lirang tenzükba mapa nung Monarchical inyakyim adoka bishop aser Tamburtem/ deacons tsüngta maparen bendang. Yamaji Bishop kati elders aser putir madak yimsü süa aru. Joko menden asem yamai lemsa inyaka aru, Bishop, Presbyter aser Deacon.

Arogo külisüba mapaji nisüangi ashiba nung masü, saka Tsüngrem Tanela sentong nung aotsüla. Tsüngremi ashiba ola jangja jangja ochi nung ayimoktsütsüla. Ochi mashi aser pei temeden samadaktsütsüla. Tajemrepba aser teküboktiba nüburtem mesotsüla.

Arogo nung Bishop/pastorji kilir mapa nung, Khrista külisüba nung tilatiba jenjang nung tenzüktsüba sür nung, tashi tulu amshia aniba ajanga tanübo arogotem nung timtem jendi adoka lir. Iba amala inyakyim ajanga item tebilemtsü adokdaktsür. Tatishitsü kar

- Arogo nung nisüng ka jenjang tuluba nung yur tanüngba tenzükertem ajemrepba doktsür;
- Khristai sayuba tenzükba nung kilir jenjang samadaktsür, kibur akümba tebilemtsü adokdaktsür;
- Tenzükba nung menden raktepba ni tuluba pa/la tilaba ta adokdaktsür;
- Makamaiter aser tepetzük tia nung alir sendoker;
- Arogoji tenzükba tiyongtsü masü saka mapa tongtipangtiba kümdaktsür

Tanabuba o jembir, Dr. Limala Longkümeri tanü tenzükba yayim tangatetba tsütsü nungi jembi. Arogoji Khrista dak amangbapur arok teloki akümba lokti. Iba arogo nung amangbapur ajak tim shilem aser temeden lir. Arogo yabo alima sobaliba ama masü. Greek oshi nung Ekklesia ya par pangdak yimsüsüba nung meyipzüka aruba tensa nung Arogo tenzükba menden tarensenji chuba yimli menden tarensen yimli nung aibelena anir aruba angutsü.

Tatishitsü asem yamai:

- Tebur yimli yimsüsüba nung arogo yimden bener aoba
- Alima Chuba yimli yimsüsüba amai arogo nung tenzükere tarensen benokba
- Tebur aser alima chuba yimlijji metenja Lai tai ratetba.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Afghan nunger jenokdaksütsü atema Arogoi sorkar dang mepishir

August 19, 2021: UK nung Arogotemi sorkar dang Afghanistan nunger kümzüksü aser parnok jenoka lidaksütsü atema mepishia arudar.

August 18, 2021 nua House of Lords nung jembidang Canterbury nung tongti putir, Justin Welby-i, "Afghanistan nung asenok den amalitepa tenzüker aika lendong nung lir, aser asenoki parnok dang taochi sayutsüla," ta metetdaksü.

Methodist Church Conference nung Tir, Rev Sonia Hicks aser tatong Tir, Barbara Easton nati, "Asenoki sepaitem nem-a shilem agidaksüogo anungji Afghanistan nunger atema UK teinyaksü khuret tulu lir aser pei tarutsü tia atema tsüburtem aser tejenokdak bushirtem asenoki yaritsüla. Küm aika (Afghanistan nung) rara-a aruba mapang nung Arogo züngsemtemi iba linük toktsür jena arurtem yariogo, aser tang ama kanga tongtibang mapang ka nung asenoki parnok dang taochi aser temeim sayutsüla," ta metetdaksü.

"Tesüiba küm 20 tashi Afghanistan nung asen Armed Forces nung Methodist chaplain tem liasü aser iba rara ajanga takoksa angurtem aika lir. Tang

tashi tenzüker sepaitem, civilian ketdangsertem aser parnok kibongtem asenoki bilemteter; tang Afghanistan tensa ajanga parnoki tamalen tatalokba aika bilemteta alitsü," ta Methodist Arogoisa metetdaksü.

"Afghanistan nung tetsürtem atema bilemtsür, kechiyong parnoki maongka agia loktiliba aser yimtenren nung kanga junga tenzüka aruogo. Tangbo item temeden kecha malitsü ta parnoki tsübur. Item tetsürtem nem tashi agütsütsü atema inyaksü aser Afghanistan nung sorkar tasenbai kasa temeden maneni agütsütsü atema inyaksü asoshi onoki alima sorkartem dang mepishir," ta Methodist Arogoi metetdaksü.

Church of Scotland General Assembly of nung Moderator, Lord Wallace-i, "General Assembly-i 2002 küm nungi tenzüka Afghanistan nung tatalokbatem repranga arudar, aser tang iba linük nung timtem tulu adokba ngua mepelar," ta metetdaksü.

"Nisung million aika lendong nung lir aser nisung meyrjang aika jenshiogo; onoki parnok atema sarasademtsür," ta paisa metetdaksü.

"Timtem nung alirtem anepalutsü, yaritsü aser jenokdaksütsü atema Laishibai asenok dang sayur. Onoki UK sorkar dang item taküm kümzüksü aser lendong nung alir Afghan nunger taküm akhümket alitsü atema tekaraba nung inyaksü mepishir," ta pai metetdaksü.

"Tejenokdak bushirtem jenokdaksütsü aser parnok asen limai arua alitsü, mapa inyaksü aser loktiliba nung shilem tajung agitettsü asoshi taküm küm tetenzüklen General Assembly-i bangzüng ka renema liasü," ta paisa metetdaksü.

"Onoki UK sorkar dang 'resettlement programme' yanglushitsü aser Afghanistan nungi arurtem jenokdaksütsü atema mepishir," ta pai metetdaksü.

Lord Wallace-isa August 19 nikongdang 5:00 ako nungi UK aser Ireland nung Arogo lenirtemi Afghanistan atema sarasademtsü, anungji nüburtemi iba sentong nung shilem agidaksüner, ta metetdakja liasü. Online ajanga ayongzüka sarasadem sentong ya Christian Aid-i ayongzüka liasü.

Uttar Pradesh nung Hindu nunger telok kati pastor ana dak azük

August 19, 2021: Pastor ana aser tena rongnung ka kinüngtsü densema parnoki Hindu nunger ka mangyimba melung süngzüksütsü merangba mapang nung Hindu nunger telok kati, parnoki pa Khristan yimsü dangi meyipdaksütsü merangogo, ta tai tonglojka azük.

Hindu nunger ka, pa kinüngtsü, jabaso aser jabaso kinüngtsü nunger ajak coronavirus tashidak agi asüba atema mangyimba mapang nung pastor ana jagi pa melung süneptsüba den külemi pa atema sarasademja liasü.

Uttar Pradesh kübok Phoolpur nung arrshi küm 62 Hindu nunger, Lalji Vishwakarma'er kiyongertemi Pastor Neel Durai, Pastor Vijay Kumar Patel aser pa kinüngtsü,

Kiran Devi nunger dak azük, aser tang parnok jail nung puoka lir.

Osangbener den jembidang Vishwakarma-i, "Ozü kiyonger Thakur Hindu nunger ozü ki telungi ait aser parnoki, pastor temi kangshia Khristan yimsü dangi meyipdaksütsü atema ozü ki semdang ta tai tonglojksü. Ozü kinüngertem asüba sülen ni mangyima liasü, ajisüaka parnoki taochi mesayu," ta metetdaksü.

"Ozü semchirtem densema onoki Tsüngrem lartemi onok semdanga onok atema sarasademtsütsü aser onok melung süneptsütsü atema onoki kanga yongyaa liasü," ta Vishwakarma-i ashi.

Iba tatalokba ya August 3 nü liasü, ajisüaka iba osang ya

tesülen ang temai adok.

Vishwakarma-isa, "Onok Laishiba amer sarasademtsü lia parnok 20 shi aruba sülen parnoki ni densema pastor ana aser ozü semchirtem dak azük," ta metetdaksü.

August 5 nü iba ken o angadanga sülen local judge kati Khristan asem bail nung chiojksü memelung, iba sülen Khristantemi district judge nem bail temepishiba ka agütsüogo.

Evangelical Fellowship of India-i ashiba agi, 2021 küm tenzüker June ita tashi nung India nung Khristantem anema inyakba tatalokba 145 liasü, aser item rongnung Khristan asem tepsetba, Tenla ki 22 raksatsüba aser loktiliba nung Khristantem sendokba tatalokba 20 densema lir.

ANOGO ABEN TSÜNGREM DEN

Asen Temanji Pa Tenla Ki

"... Nenok temangji pa tenla kit a nenoki memetet no? Kechiyong jenjang talang agi nenok alizük, anungji nenok temang nung Tsüngrem sentsüwangshidakjang." I Korint 6: 19-20

Tejen lai mapang Yihuda nunger yimsü agi, Tenla kiji tekümelemdal kija dangbo masü saka iba ya Tsüngrem tanela amungdak aser taildak liasü. tenla kiji nisungi yangluba ki ka dang masü saka temeshi rongnung temeshitiba tesem, aküm tetushi, tekümelemdal aser taküm tenladak ta züngshi. Asen shi temang dak kodang aseni rangloker, asen tenük telen, teni, tebang; arakzüba aser inyakba ajakji asen meyong aser asen sasa aseni nulungba ama amshir. Saka tanep lai O nung ashiba agi asen temangji iba kija dang jibo masü saka ya temeshi tenal ki ka lir. Talisa shirnoki pei taküm aser Temulungjang Tsüngrem nem bendanga agüja, tekümtet ngur ali, asen temangji Tanela temeshi talidak ka lir, asen meyung, masü ta angateter. Aser iba 'kidang', mapang ajak nung, Tsüngrem külemtsüla aser tushitsüla.

Iba tangatetbaji lira, joko asen temangji asen kibur masü. anungji kechi maparensa südir süaka-shi, tanela, tebilemba, mulungtetba ajungaji memeshiba aser memerükba atema masü saka temeshi maparen asoshi, kibuba mulungba agi anishitsü atema bendanga agütsütsüla. Ya temeshi rongnung temeshitiba tesem, aküm tetushi, tekümelemdal aser taküm tenladak ta angajemdi.

SARASADEM

Oba Tsüngrem, ni kü mangy a Nai koda lidaksünür yamaji meshiteta ayutsü atema alitsü yariangma. Amen

MP kati UK nunger missionary 228 Afghan nungi anir arutsü mepishi

August 20, 2021: UK Khristan MP-isa, House Parliament nung Khristan MP nung Prime Minister-i iba linük kati UK Prime Minister, Boris Johnson dang British nunger missionary ajak Afghanistan nungi anir arutsüla, ta mepishiogo.

Ibaji langzüa Prime Minister, Tawa US sepaitemi Johnson-i, nisung ajak anir Afghanistan toktsür aoba sülen arutsü atema Parliament Taliban teloki iba linük agiogo, House-i akokba tashi inyakdar, aser tang iba linük nung tensa ta metetdaksü.

kanga mejungi lir. Bodhbarnü Parliament nung Prime Minister-i Afghanistan tashi nung UK nunger 306 aser Afghan nunger 2,052 anir aruogo aser maneni Afghan nung 2,000 anir arutsü atema sülen Democratic Unionist Party MP, Ian Paisley Jr-i senso inyakyim renemogo," ta missionary tem ajak Afghanistan linük nungi anir arutsü mepishi.

Paisley Jr-i, "Tang Afghanistan nung missionary 228 lendong nung lir, ta pai [Boris Johnson] meteta alitsü. Item missionary ajak Afghanistan nungbo Islam Afghanistan nungi anir arutsüla. Atangji iba linük nungji nisung meyrjang aika taküm lendong nung lir," ta metetdaksü.

Khristan MP-isa, House Parliament nung Khristan MP nung Prime Minister-i iba linük nungi lendong nung alirtem ajak anir arutsü atema inyaksü, ta sangdongtsü asü?, ta asüngdang.

Ibaji langzüa Prime Minister, Johnson-i, nisung ajak anir Afghanistan toktsür aoba sülen arutsü atema Parliament Taliban teloki iba linük agiogo, House-i akokba tashi inyakdar, aser tang iba linük nung tensa ta metetdaksü.

Prime Minister-isa, "Tang tashi nung UK nunger 306 aser Afghan nunger 2,052 anir aruogo aser maneni Afghan nung 2,000 anir arutsü atema inyakyim renemogo," ta metetdaksü.

Persecution watchdog Open Doors USA-i ashiba agi, tang alima nung Khristantem tamajungtiba reshikangshiba linüktem rongnung Afghanistan ya tanabuba jenjang nung lir.

Afghanistan nungbo Islam yimsü toktsür tanga yimsü agizükbaji maaksü, aser Islam yimsü toktsürtem aika tepseta indoker.



August 16, 2021 nü Flatbush, Brooklyn nung aliba St. Jerome Roman Catholic Arogo Tenla kima Council member Farah Louis, Jackson Rockingster aser Rev. Al Sharpton leniba nung Khristantemi Haiti menoknok agi kongshirtem atema sarasademtsüba sentong agidang tangokba noksa nung angur.

OLONG PAITEP # 5911

1						2				3
								4		
5		6				7				
8										9
									10	
				11		12				
		13								
14								15		
			16							

TIPIEN		LANGTSÜNGLEN	
1. O jembitsü tashi	- 8	1. Tepok telung nung shilem ka	- 7
5. Süngjang tapu ka	- 5	2. Tamajung aküm	- 5
7. Tekanük nung enokba	- 5	3. Chi den külemi achiba	- 3
8. Teka amtep	- 5	4. Meimchir alimai aruba	- 3
12. Tzük asendak	- 5	6. Laishiba nung ayong ka	- 4
14. Tsünpang tema aliba	- 5	9. Tarutsü nükla	- 7
15. Ken atenba yimya	- 5	10. Tamendakdak/Nükjidong	- 4
16. Asangur	- 8	11. Tenük-telen mejungi aküm	- 5
		13. Terok nungi adokba	- 3
		14. Meimchir telemasa	- 3

OLONG PAITEP # 5910 TELANGZÜBA

TIPIEN :		LANGTSÜNGLEN :	
1. Taa, 3. Teküm, 6. Albelen, 7. Aut,		1. Tai, 2. Asensor, 3. Tanü, 4. Kua,	
9. Ajizük, 10. Ojala, 11. Semer,		5. Mitsüksü, 6. Azübenshi, 8. Lah,	
13. Sen, 15. Kiochtsü, 17. Itsük, 18. Kar.		9. Jangkok, 12. Akok, 14. Nashi,	
		16. Sür.	



TENYAR-I NAGA NUNGER KHRISTANTEM MENÜTSÜR

Tenyar : Haaaaaaa... haaaaaaa... hooooooo... hooooooo... hiiiiiiii...
iiiiiiii... waaaaoooo... Naga nunger ya... Talisa Aotsür-
Aor... Tamang ya iba tashi dang aküm noo...!!!???

Alokba : Akaaaaaaa... !!! Tenyar... Na ya shirnok menutsürba yamai
külakshishia menur ...??? Na ya ozü Naga nunger... Mesura
ozü Aotsür-Aor menutsür-bo masü sudi-do...!!!???

Tenyar : Eeeessh...!!! Ner Naga nunger seplasepshiba tamang ngur
menur-ba aja...!!! Corona tashitak adokli ner Naga nunger
Arogo/Mungdang lenir... Shiner/Mangdang/Tamang
Tir-i anir tamanger ajaki... Teküratiba nung COVID-19 tashitak
nokdangtsüba Vaccine yanglutetdakang ta sarasadem
yinzü/lumiba ayongzüka arogo ajak nung sarasadem...
Tsüngremi aji langzúa Vaccine mapang shitak nung
yanglutetdaksü... Ajisüaka tangbo iba Vaccine-ji agira
Mojing-i '666' Seal ajenloktsütsü... Tetsür tanur
mabentsü... Olulu tapu-tapu purapujia 'Social Media' ajunga
nung bulua prokshiba ya koda...!!!???

Alokba : Ayyyaaa...!!! Tenyar... Nai menütsübaji kanga shitak
menütsür ako... Saka ya ozü Naga nunger-a ajaki-bo olulu ya
jembir masü ako... Oda tangatetera-sa karbo lir-ko.
-Lilir : L.Kika Pongener.

AO OSHI ANGAZÜKDAK:
TANÜ ANGAZÜKTSÜBA OJANG

Kongsang
(n) süngdong nungi sanga aoba süngsang (branch)
* **Kongsang** aika aliba süngdongi akhüm tajung agütsür.

Kongshi
(v) tetsüng teben agi tangshiba (touch)
* Yisui shiranger dak **kongshi** aser aneptsü.



NAI-A YA METETTER MA?

INDIA NUNG NÜBURTEMI SAPUA ALIBA TWO WHEELER KAR: JULY 2021

			
1	Hero Splendor	2,50,794	
2	Honda Activa	1,62,956	
3	Honda CB Shine	1,16,128	
4	Hero HF Deluxe	1,06,304	
5	Bajaj Pulsar	65,094	
6	Bajaj Platina	54,606	
7	TVS XL100	49,279	
8	Suzuki Access	46,985	
9	TVS Jupiter	38,209	
10	Bajaj CT100	27,962	

TANÜBO NAI LANGZÜANG

Q. Linük kobai New Global Youth Development Index nung temaba jenjang tongtet?
A. Singapore B. India C. Germany D. Japan
_____ (Taruba adok nung onoki langzüsü)
YASHI ADOK TELANGZÜBA : 1960

SUDOKU # 5952 **TELANGZUBA # 5953**

	4					3	5	6	1	8	2	9	4	5	3	7	
7	5	1			9			8	5	7	2	8	1	3	4	6	9
	6				1	9			3	9	4	5	7	6	1	2	8
8					3			2	2	4	9	3	6	1	8	7	5
1		5		6		4			7	6	5	4	8	9	3	1	2
3	7	4			2				1	8	3	7	5	2	9	4	6
	3	7				2			9	5	6	1	4	7	2	8	3
5	8		3		7				4	3	7	9	2	8	6	5	1
6			8		4			7	8	2	1	6	3	5	7	9	4

OJANG LUTEP # 5497

NGTASA :

ANTG :

AT :

ANGMLEEBIMDI :

EMZTARÜK :

KAMAI :

INDAYAKNG :

KSATAKO :

RUTSAJUÜSA :

ERAKÜM :

OJANG LUTEP TELANGZÜBA # 5496

**KECHI MAPA INYAKDIR TAMASA JUNGA SHISADANGER SÜLENANG
AJEMALUA INYAK TENZÜKANG**

TAN HOPTA ATEMA - KOMA SÜLA ?

Q. Clean election takok angutsü atema voter shia dangi "ni' vote mayoktsü" ta sign südaktsüyonga Signature campaign sentong ka agia ao nunga koma süla ?



August 19, 2021 nü New Delhi nung aliba US Embassy kima Afghanistan nunger adenshia aliba noksa nung angur.

India-i Taliban den inyakyim teladak asütsüla: Yashwant Sinha

New Delhi, August 19 (Agencies): Brihostibarnü taoba mapang External Affairs Minister, Yashwant Sinha-i, India-i Taliban den inyakyim ajak teladak asütsüla aser Kabul nung Indian Embassy lapoker ambassador tanaben meyipa yoktsüla, ta ashi.

Afghanistan nungertemi India kanga meimer saka Pakistan nunger dakbo maket, ta shia Sinha-i, Taliban teloki Pakistan nunger dak metaloktsü, ta India sorkari mebilemtsüla, ta ashi.

India ya linük tuluka, anungji India sorkari Afghanistan ya Pakistan tashi kübok lir ta mebilemi Taliban den melung lemtepa inyaksangshitsüla, ta

pai ashi. Paisa, Taliban teloki Afghanistan agiadokogo, anungji India-i keraa telemteba magitsüla saka repranga atatsüla, ta ashi.

US sepaitemi Afghanistan toksür aoba sülen nungi tenzüka Taliban teloki tongtibang yimi aser jila aika agia liasü aser tangbo linük tesem ajak parnok tashi küboki aitogo.

Interview ka nung jembidang Sinha-i, "2021 küm Taliban telok ya 2001 küm Taliban telok ama masü amai reprangteter. Tepila kar lir ama reprangteter. Parnoki tagitsü o aika jembidar, anungji item oji züngshitsüla," ta ashi.

"Tamalen parnoki mejungi

inyakba nung ajemdaker khenyongi meshisadangi parnok maitsütsüla. Asenoki tang aser tarutsü nung rangloker inyaksüla," ta pai ashi.

Sinha ya taoba mapang Atal Bihari Vajpayee-i aniba sorkar mapang nung Foreign Minister inyaka liasü, saka pai mapang talangka Modi sorkar aser BJP aija aruba sülen tangbo pa Trinamool Congress nung tatong Tir inyaker.

Paisa, India-i kanga aritepa Embassy manenba tajungba süla, ta ashi.

Mongolbarnü India sorkari IAF tayimtsü ajanga ambassador Rudrendra Tandon aser Embassy staff tem Kabul nungi anir arua liasü.

Nisung crore 3.86-i mapang shidak nung vaccine dose tanabuba magi

New Delhi, Luroi/August 19 (Agencies): India nung nisung crore 3.86 dak temai mapang shidak nung coronavirus vaccines (Covishield aser Covaxin) tanabuba dose magi, ta Brihostibarnü centre sorkari metetdaksü.

RTI tasüngdangba ka langzüdang Centre sorkari iba osang metetdaksü.

CoWIN portal nung shia aliba agi, Brihostibar (August 19) nikongdang tashi nung nisung 44,22,85,854-i vaccine mezüngbuba dose agiogo aser iba nungjagi nisung 12,59,07,443-i vaccine tanabuba dose-a agiogo.

Raman Sharma-i Right to Information (RTI) Act kübok vaccine mezüngbuba dose agirtem aser mapang shidak nung tanabuba dose magirtem osang tejangja meshia liasü.

RTI tasüngdangba langzüa Union Health Ministry kübok Covid-19 vaccine administration cell-i, Covishield mezüngbuba dose agiba sülen anogo 84-112 tsüngda tanabuba dose ji agitsüla, aser Covaxin mezüngbuba dose agiba sülen anogo 28-42 tsüngda tanabuba dose agitsüla, ta ashi.

"Covishield vaccine mezüngbuba dose agiba sülen mapang shidak nung tanabuba dose magirtemji 3,40,72,993 lir," ta parnoki metetdaksü.

Ano Covaxin mezüngbuba dose agiba sülen mapang shidak nung tanabuba dose magirtemji 46,78,406 lir, ta parnokisa metetdaksü.

"Vaccine mezüngbuba dose agirtemi mapang shidak nung tanabuba dose-a agitsüla," ta Covid-19 vaccine administration cell-i metetdaksü.

Sorkari dose anaprongla agitsü tuyur aser dose anapronglaji vaccine type kasa asütsüla.

India nung ano nisung 36,401 dak coronavirus putetogo aser tesüiba ghonda 24 tsüngda iba tashidak agi shiranger 530 süogo, ta Brihostibarnü Union health ministry-i metetdaksü.

Tang tashi nung linük nung iba tashidak agi shiranger 4,33,049 süogo.

Tang linük nung coronavirus agi teshirangdakpur 3,64,129 dang kumogo aser ibaji coronavirus caseload nungi shilem 1.13 dang lir, ta Health Ministry-i metetdaksü.



New Delhi, August 19, 2021: Taoba mapang Ato kilonser, Rajiv Gandhi sor küm 77 ajungba anogomong nung New Delhi nung Parliament kima Delhi Congress Tir, Ch. Anil Kumar aser Rajiv Gandhi Jyothi Sadbhavana Yatra züngsemtemi Rajiv Gandhi kürakyanglu nung nazrozük azükja akhüm agütsüba sülen tangokba noksa nung angur.

CPI MP, Binoy Viswam-i Afghan nunger jenokdaksütsü mepishir

New Delhi, August 19 (Agencies): Taliban teloki Afghanistan agiba sülen CPI MP, Binoy Viswam-i Ato kilonser, Narendra Modi dang, India linük nung jenoka linur Afghan nunger nem tamangba yimsü kecha mebendangi refugee jenjang agütsütsüla, ta mepishiogo.

"Asenok atema tongti teinyaktsüji, Afghanistan nung alir India nunger ajak anir arutsüla. Tensa majungba apir asenoki kanga junga asadanga tekaraba nung parnok ajak Afghanistan nungi anir arutsüla,

kechiyong tang iba maangkaji lapoka lir," ta pai ashi.

"Alima nung tang India nunger jenjang aser South Asia nunga India-i shilem tajung agiba nung ajemdaker asenoki tamangba yimsü kecha mebendanga refugee tem agizüktsüla. Tang Taliban yimsüsüba nung ajemdaker India-i arua liner Afghan nunger ajak nem refugee jenjang agütsütsü atema ni Centre dang mepishir," ta pai shidi ka ajanga Ato kilonser dang mepishi.

Paisa, tang India nung aliba

Afghanistan nunger ajak nem visa extension agütsütsüla, ta ashi.

"Talisa ni asen linük nung aliba reju balala nung azünger Afghan nunger kaketshirtem nem tejenokdak agütsütsü mepishir," ta pai ashi.

"Meimchir taküm kaji kanga tongtibang, anungji rara mapang nung tai maketertem kümzüktsü atema India sorkari intyaksüla. Meimchir temeim mapa nung ajemdaker ni India sorkar dang tai maket Afghanistan nunger nungitsü aser yaritsü mepishir," ta pai metetdaksü.

SC-i Centre aser Bengal dang Lokur panel dak sendakba telangzüba meshir

New Delhi, August 19 (Agencies): West Bengal nung Israel nunger Pegasus spyware amshia tongti ketdangsertem itdangitba ken o bushisüngdangtsü atema July 27, 2021 nü West Bengal sorkari taoba mapang SC judge, Madan B Lokur leniba nung Lokur commission tentetba thinentsütsü atema Supreme Court nem temepishiba ken o ka agütsüba dak sendakba nung Supreme Court-i Centre sorkar aser West Bengal sorkar dang nungi telangzüba meshiogo.

Chief Justice, N V Ramana-i aniba bench-i Centre aser Bengal sorkar na dang melungtet telok- 'Global Village Foundation'-i SC nem temepishiba ken o ka agütsüba dak sendakba nung telangzüba meshi.

Melungtet telok jagi advocate Saurabh Mishra ajanga Court dang, Pegasus ken o ya state kati shimba commission masü saka India

ajak nung bushisüngdangtsü atema technical mongintemi akümba commission ka tentettsü nüngdak, ta metetdaksü.

Mishra-i Lokur Commission maparen ajak anenja atatsü mepishi saka CJ-i aniba bench-i, Centre aser Mamata Banerjee-i aniba West Bengal sorkar nati telangzüba agütsüba sülen ang telemteba agitsü, ta metetdaksü.

Melungtet telok jagi Supreme Court dang, Pegasus mangatettep ken o ya ajanga linük tesem ajak kongshiogo, anungji iba ken o ya state ka nung dang masü saka linük tesem ajaklen bushisüngdang nüngdak, ta mepishi.

"Iba ken o ya tulu aser iba ya ajanga linük sensotem kongshir, anungji Pegasus mangatettep ken o ya kanga aroka bushisüngdangtsüla. Bengal sorkari inyakba ama iba ya linük temzüng dak mapetba yimya nung meinyaktsüla," ta temepishiba nung shia lir.



August 19, 2021 nü Mumbai nung Union Minister for Minority Affairs, Mukhtar Abbas Naqvi-i Padma Bhushan award angur kaketzülur, Gulzar ajurudang tangokba noksa nung angur.

Pakistan nung bomb tesashi ka apok; nisung 3 asü, 50 yiru



Islamabad, Luroi/August 19 (Agencies): Central Pakistan nung Shia Muslim nung procession aoba mapang bomb tesashi ka poka nisung asem asü aser 50 yiru, ta ktdangsurtemi ashi.

Tamangba yimsü tsütsü nütsüing yongsük tajemba, Shia Muslim nungertemi Brehostibarnü Ashura amungba mapang sepaitem saksalema liasü. Iba benjong ya temeshi Muharram ita tenzüker anogo 10 buba nung amunger, kong taoba mapanga tamangba yimsü dak ajemdaker azüdokshia liasü.

Linük anüdoklen Punjab province kübok Bahawalnagar yimti nung iba lendong ataloka liasü. "Iba lendong nung nisung asem asüba aser 50 yiruba jangjaogo," ta iba yimti nung sorkar ktdangsur kati ashi.

Social media nung video

prokshiba nunga azü yima aliba nisungtem lenmang nung mejanger nüburtemi yaritepba nguogo.

Yangji aliba police tanishir Kashif Hussain-ia asü-amaba osang ya tejangja osangbener dang shiogo. "Tang tashi iba bomb apokba yimya mejangjateti lir aser lendong atalokba tesem nungi ktdangsurtemi kuli bendener," ta pai ashi.

Ashura procession mapang nüburtem lendong balala nungi kumzüka ayutsü mechi ktdangsurtemi tongtipang yimitem nung mobile phone service shibangja atar. Yamaji Brehostibarnü jila balala nung alirtem mobile signal shidak monguteti liasü.

680 AD nung Battle of Karbala nung Prophet Mohammed'er semchir Hussein tepsetba bilemteta Ashura ya

amunger - koba Shia Islam poktetba nung tongtipang mapang ka lir.

Mapang tatsüka lir iba procession ya maneni agi aser nüburtemi maneni sentong balala agia liasü, ta ktdangsurtemi ashi.

Sunni yimsü akang-akanga amangertemi Shia nung anema azüdokshiba ya mapang shia ajurur. Pakistan nütsüing yongzüik million 220 aliba nungi shilem 20 shi Shia nung ya lir.

Shia nung anemba telok balalai tekülem ki nung bomb pokloktsü aser Ashura procession nung tenük yoker amakdang nisung meyrirjang aika tepsetogo.

Sunni nungrtemi Hussein ya tushia amshir, saka Sunni yimsü ret-reta külemer temi yimjak nung Hussein asüba mangyimba anema nokdaker.

Malaysia PM akümtsü jenjang nung Ismail Sabri lir

Kuala Lumpur, Luroi/August 19 (Agencies): Taoba Malaysian Deputy Prime Minister Ismail Sabri Yaakob-i hopta tetenzüklen laoba kasa coalition nungi parliament nung menden timba ngutetba sülen taruba sorkar akümtsü anasai aor.

Ibai tejangja kumra, Ismail Sabri shimtetba ya ajanga general election nung United Malays National Organisation (UMNO) party-i tamakok ajurur küm asem lir meyipa shilanger akümtsü. Ochimashi mapa inyakba, talisa investment fund 1Malaysia Development Berhad (1MDB) nung sen dollar billion aika tim mesüi amshiba tai tongloktsüba sülen iba party yagi taoba election nung tamakok ajurua liasü.

Caretaker Prime Minister Muhyiddin Yassin, shiba hopta tetenzüklen pa busemer ajema akumba ajanga tamakok ajurur mapa nungi anen, pai election agitsü tensa tajung ka makum tashi COVID-19 tashidak wara den maneni raratsü aser linük shia arudaktsütsü mechi par coalition lungjemer taoba deputy ya yari, ta Brehostibarnü ashi.

Ismail Sabri-i cabinet züngsem tasentem anema ken o mebenoktsü züngzükteper yari, ta pai sangdong ka ajanga ashi.

2018 election nung tamakok ajuruba sülen UMNO yimten yimsüsür kar anema ochimashi ken o benoka lir.

Parliament züngsem 222 aliba nungi züngsem 114-i tang Ismail Sabri busema lir, ta UMNO Secretary-General Ahmad Maslan ajanga tweet ka



Ismail Sabri Yaakob

nung ashi. Parliament nung simple majority atema züngsem 111 nungdaker.

King Al-Sultan Abdullah-i linük indang chuba yimli nung danga ktdangsurtem ajuruba sülen sorkar tasenba anitsü asoshi tekolakba shimtetba osang ya Hokulbarnü sangdongtsü amai lir.

Malaysia nung chuba indang shilem ya timba sentong balala nung shilem agiba dang lir, saka Parliament nung züngsem timbai busemer ta amangba ka pai ato kilonser shimteter.

Ismail Sabri'er UMNO party yagi küm 60 dak tali linük nung yimsü süa arur 2018 election nung tamakok ajuru. Iba sülen sorkar ana tentet, saka tashi mait loksa.

Tesüsaba sorkar nung UMNO dena liasü, saka Muhyiddin'er coalition ya legislature kari yutsüba sülen lao.

Sabri den tokteper ya Anwar Ibrahim lir, shiba party asem lungjemba nung tekolakba lir, aser vote 88 bener opposition bloc tulutiba lir. Opposition party ajungai pa yariyonga pai vote 105 dang ngutettsü.

US sepaitem Afghan yutsüba sentong menutsü akok: Joe Biden



Washington, Luroi/August 19 (Agencies): US sepaitem Afghanistan nung anizüker arutsü mapang lateta aliba dang nungi talangba alitsü akok, kechiaser Taliban telungpurtemi linük yutsür aotsüpur Kabul indang airport bushia aoba nung tenokdangba agütsür, ta US Tir Joe Biden-i ashi.

Biden-i US sepaitem ya tan ita tatem tashinung Afghanistan nungi anizüker onüa liasü, saka tang tashi iba linük nung US senso 15,000 jungnüa tsükdangradanga lir.

Kabul nung mepetmesü ya paidoktsü makokba ka lir, ta US tiri ABC News dang ashi.

Bendanger sepaitemi iba linük nungi Anüolen linük nüburtem aser parnok den külemi inyakba Afghan nungertem tayimtsü amshia anizüker aor.

Washington-i anüngzüka aliba America nung senso ajunga den taoba mapang US mitkar asoshi oshi meyipzüktür densema Afghan nung nisung 50,000 nungi 65,000 tsüngta anizüker aotsü nangzüka lir.

Tang tashinung America nungeri nisung 5,200 dak tema anizüker ogo, aser item rongnung nisung 2,000 bo tesüiba ghonda 24 tsüngta anizüker aoba alitsü.

Pentagon-i osangbener dang tayimtsü amshia nisung anizüker aoba ya timba kuma anogo shia nisung 9,000 tashi anir aotsü nükjidong lir, ta ashi.

Afghanistan yimtiba nung aliba Karzai International Airport ya US sepaitem 4,500 shii khen atema amokbanga lir, saka iba tesem ya müketa Taliban sepaitem aser checkpoint tem agi sünga lir.

Deobarnü nungi tenzüka iba airport telung aser temeket nung nisung 12 tepsetogo, ta Taliba ktdangsur kati osangbener dang ashi. Asürtem ya prangbong agi khasetba mesüra ajemsetba alitsü.

Senzüsemongtsü document maliba Afghan nungertem iba airport telungi aitsü merangba Taliban temi nokdang, aser temelaba liaka kanga timtema ajanjteter.

Afghan nung oshi meyiptsü ka Australia mitkar indang tayimtsü ka bushia Mongulbar aonung airport-i aotsü merangba mapang Taliban teloki tetsüing nung akham ta ashir.

US senso kari tayimtsü nung aotsü asoshi mapang lateta aliba ama menepa motet, ta osangbener dang ashi.

US Defense Department nungi temelaba agüja ali tashi domestic air carriers aser civilian pilot tem nübur anizüker arutsü aser teyari agütsütsü asoshi Kabul-i yoktsü, ta US Federal Aviation Administration ajanga Bodhbar aonung ashi.

Rongrong adoka sepaitem aser nüburtem anizüker aoba maparen nung aibelen kar ali asü mali, ta ABC ajanga asüngdangba mapang, "Aibelen mali," ta Biden-i langzü.

"Rongrong madoki nüburtem anizüker arutsü lenmang kar danga alinungbo ni aji memetet," ta pai ashi.

Taliban anemertem linük nisan amer Afghan yimti kar nung Brehostibarnü longkak aita liasü, aser yangji telungpuri injang khaloktsüdang nisung kar asü, ta ashir.

Afghanistan nung 1919 küm British nung dang nungi nüjiso ngur iba anogomung amungba mapang tebur telok ka den tetsür kar dener "Asen nisan, asen ayak," ta ayimtena nisan amer jaja liasü.

Tetsür ka tapubang nung nisan ka amloker jaja liasü. Yangji jajar kari "Ajak dang Tsüngrem tulutiba," ta ayimtena

liasü.

Taliban telok Deobarnü Kabul yimti-i aiba sülen alima dang parnok ya tajung amai sayur aser parnokia tenunep aginer, tsükchir tejen dang mang mayangtsü aser tetsür temeden Islamic law kübok akümtsübuttsü, ta ashir.

Taliban teloki 1996 nungi 2001 tashi yimsü asüba mapang tetsür nem tenokdangba balala agütsü, yimjak nung nisung tepset aser Buddhist süngyangu tejen tem poktsü, aser tangbo parnoki melenshiogo, ta ashir.

Linük anüdoklen Kunar province indang yimtiba, Asadabad nung rally ka agiba mapang nisung kar tepset saka item nisungtem ya Taliban teloki injang khaloktsüba nung asüba asü mesüra nungtepba mapang asübar mejangjateti lir.

Longkak aita ya Jalalabad yimti aser Paktia province kübok district ka nunga ataloka liasü.

Bodhbarü Jalalabad nung nisan ayiptena longkak aiter dak Taliban teloki injang khalokja nisung asem tepset, ta osang ajanga ashi. Kasaji Asadabad aser Khost yimitem nunga ataloka liasü.

Tuensang nung 'Smoke Free District HQ Campaign' tenzüksüogo



Tuensang, Luroi/August 19, 2021 (TYO): Mongolbarnü (17.08.2021), DC's Conference Hall, Tuensang nung 'Smoke free Tuensang district HQ campaign' tenzüksüogo ka agia liasü, ta sangdong ajanga metetdaksü.

Iba sentong nung, Deputy Commissioner Tuensang, Kumar Ramnikant-i, moko (smoking & non smoking tobacco) nung nicotine dena lir, koba ajanga moko achitsü asoshi yimya tamajung süpadaksü aser iba den külemi moko nung inoka yangluba - 'carcinogen' ajanga cancer tashidak adokdaksü; aser item dak sendakba nung nübur dang tekümdangtsü osang sangoktsüsüla, ta ashi.

Moko achiba ajanga moko achir (primary consumer) achir kisung dang masü, saka pa/la (moko achir) mekuta alir (non consumer secondary aser tertiary individual) ajak

timtemdaksü aser ibaji lendong lir, ta pai ashi.

Moko achiba ajanga asenok respiratory system raksatsü aser tang ama Covid-19 wara mapang, tango sashitsü timtemer tem (respiratory problem) asoshi iba ya lendong tuluka asütsü akok, ta DC-i shisem.

DC-isa, Tobacco Consumer Control Cell dang district kübok tesem ajanga nung 'Smoke Free District HQ Campaign' tenzüksütsü aser temesepba chiyongtsü tem achiba/amshiba dak sendakba nung de-addiction atema rehabilitation centre ka lapoktsü asoshi ajungshia liasü.

SP Tuensang, Amit Nigam-i, COTPA 2003 indang Section 4 nung ajemdaker telok den jembia liasü.

Iba Section ajanga, lokti kazüba tesem nung moko achiba khenyongi nokdang aser COTPA 2003 indang Section 6a & 6b ajanga

shisaliok reju temeküt 'yard 100' tsungda nung tanurtem dang temesepba chiyongtsü ayokba aser iba den külemi 'tobacco product' tem ayokba nokdang, ta Nigam-i ashi.

Police-i iba temzüng akang akanga amshitetsü asoshi, sensopurtemi police den telongjem nung inyaksüla aser 'COTPA 2003' dak sendakba nung nüburtem dang tekümdangtsü osang sangoktsüsü asoshi sensopuri shilem agitsüla, ta pai ayongzuka liasü.

Maneni, iba sentong nung Jr. Dental Specialist, Dr. Ao Yanger-i iba campaign indang nukjidongtem telok dang metetdaksü. 'Tobacco Free' sangdongba School aser yimsung tem nem certificate agütsü. St John Higher Secondary School, Akum Imlong School aser Kuthur Village ajanga certificate agizük, ta kasa sangdong nung shia lir.

Little Mix-i kensep tasen ka sangdong



Los Angeles, Luroi/August 19, 2021 (Agencies): Kentener telok, Little Mix-i kensep tasen ka sangdongogo. Jesy Nelson-i iba telok toktsür külen nungi Little Mix-i mezüing kensep sayatsü renemdar.

Little Mix tenteter küm 10 ajungba nüngtem nung, Brehostibarnü (19.08.21), tetsür teloki 'Between Us' ta nüngja agütsüba kensep tenetbuba sayaogo. Tang iba telok nung Perrie Edwards, Jade Thirlwall aser Leigh-Anne Pinnock nung dena lir.

Iba kensep November 12, 2021 nü sayatsü aser iba LP nung telok indang nüngtugu ken

densema ken tasen pungo yangluogo.

2011 küm 'The X Factor' nung parnoki shilem agiba clip densema video ka nung, "Between Us" ya 2020 küm sayaba 'Confetti' kensep den tatongtep asütsü, ta parnoki ashi.

"Iba kensep (Between Us) sayatsü asoshi onok yongyaseter. Kensep tasenba nung onok indang nüngtugu ken ajak aser iba den külemi ken tasen kar dena lir. Nenok nem iba kensep angadaksütsü asoshi matateter. Tesüiba küm 10 nungi, nenoki onok kanga nungita aruba atema pelaba

lemsateper aser iba kensep ya onok ken sapur ajak atema lir. Nenok teyari ajanga onoki iba kensep sangdongtsü maongka angur. #10YearsOfLittleMix," ta Little Mix-i lemsateper.

Arishi küm 28 tain Perrie-i, "Iba telok tenteter küm 10 tashi takok ngua aruba ya mamangteter. Memeteti dang mapang süiaogo aser tesüiba küm repringdangra onoki lenla aika nung takok nguogo aser ajakji nenok temeim ajanga dang lir," ta ashi.

"Kentener telok ka ama, kensep ka nung onok indang nüngtugu ken ajak sayatsü mapang agi sempettsüba asoshi pelar aser küm 10 ajungba nüngtem nung onoki iba maparen mezüing inyaker asütsü. 'Wings' nungi tenzuka 'Heartbreak Anthem' ken ajanga artist ama onok maparen nung renloka aruba kuli asütsü," ta arishi küm 28 tain Jade-i ashi.

"Onoki ken mejema aser yanglua aruba nungi Little Mix tenüing nung ken tasen pungo shi sayatsü asoshi yongyaseter. Fans nem item ken tasen angadaksütsü asoshi onoki matateter. Onoki meima yangluba ama, fans temi item ken tasen saputsü imlar," ta külem band nungi arishi küm 29 tain Leigh-Anne-i shisem.

Office of the Mereshiba Aso Kidong

Chuchuyimlang Village
P.O.Chuchuyimlang Town - 798614
Dist. Mokokchung, Nagaland

KONANG NÜNGSANG



Chuchuyimlang Mereshiba aso kidong nungi Soja Sotet Wb. Wapang Jamir IPS, IGP INT-I Gujarat, S/o Mr & Mrs. M.Chuba Jamir, Meritorious Service award agizükba nung nüburtem ajak tepela peridaksüogo. Ano tarutsü anogo nunga Tsüngremi ne mapa wadang tuluba asoshi moajangma ta ajaki sarasademtsür.

Sd/-
Aosanen
President

Sd/-
Lanulemba
Secretary

OFFICE OF THE AONOKPU SENSO MUNG DANG

H.Q. AONOKPU : NAGALAND

KONANG TETUSHI AGÜTSÜR

Aonokpu nung samanir Sannüker Makenshilu Imsong jabaso rongnungi, yimpatir Noknawaba Imsong aser Tekanaro Walling na nangpong Rev.Dr.Abraham Longri Lincoln-i A History of The American Baptist Mission Among The Ao Naga Tribe in Nagaland (1872-1955) zülua, Gordon-Conwell Theological Seminary, USA nungi Doctorate degree anguba takok tulu asoshi tenüingsang aser tetushi pa aser par kibong nem agütsür. Iba takok ajanga Aonokpu nübur ajanga nem tetushi aser konang tulu bener arutsü nung nübur ajaki pelaba den Tsüngrem tenüing kanga asanger.

Tematiba Tsüngremi maneni pa wadang amung tema azükarudakja aniangma.

Dated: August 18, 2021

Sd/-
L. AKÜMBA LONGCHAR
President

Sd/-
L. RONGSENTEMSÜ JAMIR
Secretary

OFFICE OF THE KOHIMA AO OFFICER TEM TELONGJEM (Kohima Ao Officers Union)

No. KAOT/G-4/Media/

Dated: 19th August 2021

PRESS NOTE

It has come to the notice of the Kohima Ao Officers' Union (KAOT), of the derogatory social media posting on 11th Aug 2021, by Mr. Kahuto Chishi Sümi, under the name "Convenor, Concerned People of Nagaland", directed against late Temjen Toy, IAS former Chief Secretary, and Mr. T. John Longkumer, IPS, DGP, Nagaland. Late Temjen Toy, was not only an active and bonafide member of KAOT, but was also its former President. Mr. T. John Longkumer, IPS, DGP is also a bonafide member of KAOT, and his impeccable track record speaks for itself.

For the record, we are as much concerned citizens and people of Nagaland. But we do not subscribe to Mr. Kahuto Chishi Sümi's allegations, nor can he claim to represent all concerned people of Nagaland.

KAOT is deeply saddened and strongly condemn his derogatory use of the words "lying Chief Secretary", on late Temjen Toy, IAS. Such irresponsible, irrational and emotional outburst with wild allegations is highly defamatory. Such allegations against a distinguished officer, who had served the State with integrity and distinction till his very last breathe, brings into question the credibility of Mr. Kahuto himself. Defaming and raising cain over a deceased person is also against the very tenets of Naga tradition.

Officers of all Departments under the Government of Nagaland, various civil societies and associations, who have had close interactions with late Temjen Toy, will vouch for his integrity and fairness in all his official dealings. While the tears and pain of a grieving wife and family, and of his well wishers, had not yet dried, calling him a "liar", is a complete falsehood, and a despicable act. We reject his false allegations. In our hurting hearts and teary eyes, the decency and humanity of Mr. Kahuto Chishi Sümi, has been irreparably diminished by just that one little bit. May God grant him peace.

(Wt. Imtinenla)
General Secretary, KAOT

(Er. Moa Aier)
President, KAOT

Cincinnati Open nungi Simona Halep tukuogo



New Delhi, Luroi/August 19, 2021 (Agencies): WTA Cincinnati Masters tetsür kija tanabuba round asayaba mapang, Simona Halep temang nung timtem adokba ajanga la iba asayamung nungi tukuogo. US Open atema renemshiba asayamung nung Halep tepi achijilen yirua liasü aser Cincinnati nung tanaben iba timtem adok.

Seed pungobuba Romania tsür Halep-i America tsür Jessica Pegula den asayatsü lemküksür alidang, mezüing round nung yiruba ajanga lai Jessica den masayatet. Mezüing

round nung Halep-i Poland tsür Magda Linette madak takok angu.

"Yashi (Bodhbarnü) tasayadak nung aoksa dang tepi achijilen tashitsü atuba sülen, physio ka nem yaridaksü aser tape agi alepbanger sülen ni asayatet aser iba round takok angu," ta Halep-i ashi.

Halep, shiba temola abilen yiruba ajanga taküm tongtibang asayamung ana - French Open aser Wimbledon nung shilem magitet, tang Cincinnati Open nunga la temang nung timtem adokba yong asayamung tom ka nungi tukadoker asütsü.

Iba asayamung round tanabuba nung Jessica Pegula den asayatsü lia, Halep-i Twitter ajanga la Western & Southern Open nungi tukadokba osang sangdongogo.

"Scan agiba sülen, tia makai tepi achiji telunglen shilong tilaka shimar aliba ngutet. Anungji, iba timtem bener asayatsü tamakoktsü," ta lai lemsatet.

Arishi küm 29 tain Halep-i ashiba agi, New York nung aruya aliba U.S Open asayamung atema renemtsü asoshi, iba timtem anepalua anisüngzüksü aser akok tashi asaya atema renemshitsü.

U.S. Open nung Halep-i Grand Slam tasembuba akoktsü asoshi tebilemba lir. Taküm May ita Rome asayamung nunga Halep yirua liasü. Iba timtem ajanga, Roland Garros, Wimbledon aser Olympics asayamung nung lai shilem magitsü lemtet.

Cincinnati Open nung, 'walkover' ajanga Pegula Round of 16-i iogo aser lai 2016 Western & Southern Open champion Karolina Pliskova den round of 16 asayatsü.

Brehostibarnü, tetsür kija round of 32 asaya nung, Karolina-i Yulia Putintseva madak 6-3, 6-2 agi takok angu.

ISL: Mumbai City FC-i defender Rahul Bheke anisemogo



New Delhi, Luroi/August 19, 2021 (Agencies): Brehostibarnü, Mumbai City FC-i Bengaluru FC nungi defender Rahul Bheke aniokogo. Defender Rahul-i küm ana contract nung 2022-23 season tatem tashi Islanders telok nung asayatsü. Iba sülen, ano kasa club nungi asayatsü asoshi pa contract atsülangtsü lenmang lir.

International friendly match metenzükdang, football asaya renemshitsü asoshi, tang Kolkata kübok arishi küm 30 tain Rahul-i National Team indang preparatory camp nung shilem agidar.

Football asayamung balala nung, India atema Rahul Bheke-i 13ben asayaogo. 2019 küm

Thailand kübok Kings' Cup nung India aser Curaçao asayaba mapang, National team tenüing nungi pai mezüing asaya liasü.

"Mumbai City nung adentsü maongka anguba ya mamangteter. Ni aliba tesem nung iba club tentet aser parnoki taoba asayamung koka lir. Pei aliba yimti aser nübur tenüing nungi asayatsü maongka ya koda jangratemtsüka aser pelar. Mumbai City nung adentsü asüingdangba mapang, ni molungsoa iba maongka agizük," ta Rahul-i ashi.

"Iba Club nükjidongtem ni angateta dang lir aser club asoshi coach Sergio Lobera-i kü dang nungi imlabatem ni meteta lir; aser tang nungi tenzüka tarutsü mapang tayongzükb

balala atema ni renema lir. Iba Club den teka amteper telongjem nung asaya tenzüksü asoshi renema lir aser fans temi kodanga mamatetsüsa iba club nung ni tajungtiba shilem agitsü imlar," ta Rahul-i shisem.

Defender ka ama Rahul Bheke-i junga asaya aruogo. Football wadang nung ajemoka, pai Mahindra United tenüing nungi mezüing asaya aser 2015 küm East Bengal-i maodang, pai Air India, Mumbai Tigers aser Mumbai FC club atema asayaogo. Linük nung nungtuugu football asayamung - Indian Super League (ISL) nunga Bheke-i aiben asayadanga lir.

2015 küm Indian Super League nung, Rahul-i Kerala Blasters FC atema asayaogo. Iba sülen, 2016 küm FC Pune City tenüing nungi pai ISL nung shilem agi, kong iba club atema pai game 10 tashi asayaogo.

2017 küm, ISL nung mezüing shilem agir telok Bengaluru FC ajanga ISL 2017-18 draft nung Rahul shima liasü. Pai shilem tajung agiba ajiteta, Club-i Rahul indang contract atsülangtsü. Ano 2018-19 campaign nunga Rahul-i junga asaya liasü, kong par teloki final nung FC Goa madak takok anguba title densema, pai goal 3 idaktsü.

Taoba season trok tashi Rahul-i asaya 92 nung shilem agiogo.

Australia squad nung Warner aser Steve denogo

New Delhi, Luroi/August 19, 2021 (Agencies): ICC Men's T20 World Cup 2021 asayamung atema, Australia-i squad sangdongogo. Iba squad nung tanga asayar rongnung captain Aaron Finch aser Steve Smith nati tanaben külem team pur den shilem agiba angutsü.

Tena den külemi, Twenty20 World Cup atema züingsem 15 Australia squad nung wicketkeeper Josh Inglis anisemogo. Australia team nung Josh-i mezüing shilem agitsü terenemba lir.

England den Ashes series masayadang, October aser November tsüingda asayatsü aliba World Cup nungi Australia-i temaba asayatem shimtsü asoshi asayar kar anisüngzükdaktsütsü ama asadanga liasü.

Taoba series ana tashi tamakok ngur sülen, Australian-i testusa T20 cricket asayatsü renemdar. Ajisüaka, tawa tembangba asayamung asem tashi nung, Australia squad nung tongtibang asayar aika medeni asaya aser taruba T20 World Cup nung Warner

aser tongtibang asayatem squad nung aniokba ajanga Australia team pur ajanzüktsü imlar.

"Onok rongnung asayar tajung kar dena lir. Alima nunga parnokji cricket asayar tajungtiba ama ajaki züingshir aser parnok sempet amshia T20 team tajung ka ama asayatsü tebilemba lir," ta chairman of selectors, George Bailey-i ashi.

"ODI asayamung aser tawa Vitality Blast nung Josh-i shilem tajung agiba asadangtetogo. Iba asayamung nung pai run timtiba yanglua liasü. Taruba asayamung nunga batting tsütsü pai squad nungitsü imlaa atar. Tarutsü nung team atema Josh asayar tajung ka akümtsü asoshi onoki yongyar," ta George-i ashi.

T20 World Cup atema Australia Squad:- Aaron Finch (C), Pat Cummins (VC), Ashton Agar, Josh Hazlewood, Josh Inglis, Mitchell Marsh, Glenn Maxwell, Kane Richardson, Steve Smith, Mitchell Starc, Marcus Stoinis, Matthew Wade, David Warner, Adam Zampa.

World Athletics U20 Championship: Rohan Kamble semi-final-i iogo



Nairobi, Luroi/August 19, 2021 (Agencies): Brehostibarnü, World Athletics U20 Championship - tebur 400m hurdles tetoktepba nung, India nung athlete Rohan Kamble-i takok ngua semi-final-i iogo.

Iba asayamung nung, India team-i jenjang ka tongtettsü atema Rohan Kamble-i tanga asayar ajateta second 55.00 nung alizüing tongteta asem.

"#Nairobi kübok #WorldAthleticsU20 asayamung nung, 400m Hurdles semi-final atema Rohan Kamble qualify süogo. Pai second 55.00 nung alizüing tongtet," ta Twitter ajanga SAI-i lemsatet.

Bodhbarnü, kasa asayamung 4x400m mixed relay team tetoktepba nung, India-i bronze

medal angu.

Taoba World Junior Championships nung Seema Antil (Discus Throw, 2002), Navdeep Kaur Dhillon (Discus Throw 2014) nati bronze medal aser Neeraj Chopra (Javelin Throw, 2016) o Hima Das (400m 2018) nati gold medal anguba sülen, taküm iba asayamung nung India team-i medal pungobuba angor asütsü.

4x400m mixed relay team tetoktepba nung India nungi Barath Sridhar, Priya Mohan, Summy aser Kapil nungeri shilem agia liasü; parnoki minute 3:20.60 nung alizüing tongteta jenjang tasembuba ajanzükdet. Kasa tetoktepba nung Nigeria (3:19.70) aser Poland (3:19.80) team nati mezüingbuba aser tanabuba jenjang ngutet.

BILEMDANGANG

"Telok nung lennir tajung melira nütsüing samar."